



ATASSUT

UPA 2016/67

Siverth K. Heilmann

09. 05. 2016

Nunatsinni erngup nukinga atorlugu pilersuinissamut kiisalu avammut niueruteqarnissamut periarfissat unammilligassallu erngup nukinganik nukissiuuteqarfiusuni piukkunnaatilinnillu Naalakkersuisut nalunaarusiornissamut peqquneqarnissaannik Inatsisartut aalajangiiffigissas-saattut siunnersuut. Nalunaarusiami erngup nukinganik nukissiorfinnik pilersitsinissamut aningaasalersuinissaq kiisalu tamatumunnga periarfissat ilaatinneqassapput. Nalunaarusiaq kingusinnerpaamik inatsisartunut UKA 2017-imi saqqummiunneqassaaq.

(Inatsisartunut ilaasortaq Anthon Frederiksen, Partii Naleraq)

Inatsisartunut ilaasortaq Anthon Frederiksen, Partii Naleraq, aallaqqaammut qujaffigissavarput aalajangiiffigissatut qulequtsiunneqartumut siunnersuuteqarnera pillugu, imatullu ATASSUT-miit oqaaseqarfigissavarput.

GTO-qarnerata nalaanili, 1970-sikkullu qiteqqunnerata missaaniit Kalaallit Nunaanni piffinni amerlaqisuni tasepassuit kuussuillu, erngup nukiliorfissaqqissutut takorloorneqartut, qanorlu nukimmik annertutigisumik tunisisinnaanera misissugarineqarnikuupput nalunaarsorneqarlutillu.

Taamatullu suliniuteqarnek kinguneqarluarpoq, Nunatsinnimi illoqarfinni arlaqartuni qujanaqisumik, erngup nukiliorfiinik mingutsitsinngitsumik pilersitsivigineqarmata. Tullinnguuttoq Qasigianguit eqqaani aallaaveqartumik, Qasigianguit Aasiaallu pilersitsiviunissaannik suliaq ingerlavoq kiisalu aamma erngup nukinganik pilersitsivigineqareersimagaluartut ilaat, suli nukimmik annertunerusumik pilersitsiviunissaannik suliniutit ingerlallutik.

Siunnersuuteqartumut ersarissarusuppara, Alcoap aatsitsiviliorusukkaluarnernani Maniitsup qeqertaaniimmat tassungali atatillugu erngup nukiliorfissatut pilersaaruteqarfigisaralui tassaammata Tasersiaq Kangerlussuup nunataaniittoq kiisalu Tassartuup tasersui Nuup timaaniittut. Suliffeqarfissuup Alcoap aatsitsiviliorqarnissaanut atasumik pilersaarummut aningaasarpasuit nammineq atorpaat, aap uvagut pingortitap avatangiisit uumasullu il. il. misissugarineranut aningaasartuuteqarnikuuvugut.

ATASSUT-miit Maniitsup qeqertaani, Alcoap alumiinium-imik aatsitsiviliornissamut assigiinngitsunik peqquteqarluni pilersaarumminik unikaallatsitsinera assorujussuaq uggoraarput, tassami ukiuni 100 sinnerlugit ataavartumik suliffinnik aningaasarsiorfissarpassuarnillu pilersitsiviusussaagaluarmat. Sulili ATASSUT-miit pilersitsinissamut neriuuteqarpugut aammalu aallareriaqqittoqarnissaanut suleqataanissarput sunniuteqarfigissinnaanerpullu naatsersuutigineqassaaq.

Inatsisartuni Naalakkersuisunilu aatsitsiviliorqarsinnaanera, pimoorussiisoqaruni Alcoa-lu ingerlaqqinniannigippat, Norge-miut (Norsk Hydro) aatsitsivippassuarnik sanaartornermik misillitagaqarluartut aperiinnariaapput, sanaartornissamut suli soqutiginninersut. Taakuummatami aamma aatsitsiviliornissamut neqeroortitsinermut peqataanikuusut.

ATASSUT-miit arajutsisimangilarput, erngup nukingata saniatigut nukissiuutit mingutsitsinngitsut atorneqarsinnaaneri aamma suliffeqarfissuit ilaanniik sanaartornissamut aningaasaleerusuttunik ukiullu amerlanngitsut ingerlareerneranni kommuune-nut Nukissiorfinnulluunniit tunniunneqarsinnaanerannut piumassuseqartunik. ATASSUT periarfissanut taamak ittunut aqutissiuussereernikuvoq ilisimalikkanillu siammartereerlugit.

Apeqqutaaginnarpoq politikkerit suleqataarusuttunut aningaasaleerusuttunut naalaarlutillu aqutissiuusseqataarusunnersut, savaateqarfiit eqqaanni, Qasigiannugit eqqaani, erngup nukissiorfiliorsinnaaneq osv. aningaasameernitsinni ineriartornissamut suleqataarusuttut tappiilliorfiginaveersaartariaqarneri ATASSUT-miit eqqaasissutigeqqissavarput.

Taamatut oqaaseqarluta, Naalackersuisut siunnersuuteqartumut akissuteqarnermi ilaliinerat ATASSUT-miit isumaqatigalugu, suleriaqqinnissamilu oqariartuutitta ilanngullugit ataatsimiititaliami nalilersorneqarnissaat ingerlaqqinnissaalu tapersiivugut.

Qujanaq.